

ARTEMIS

Schule und Beratung für Mensch und Tier



WOCHENHOROSKOPE

THUN AKTUELL

2022

Woche 26. Dezember 2022 bis 01. Januar 2023

Bevor mir zäme i di neu astrologischi Wuche luege, möcht i nomau ufä 23. Dezämber 2022 igah. Mir hei ä Neumond im Steibock gha, wo d'Energjä i de nächschte Täg mitbestimmt. Dr Mond het ä Konjunktion zur Sunne u äs Quadrat zum Jupiter gmacht. Mir sötte somit ä Balance finge, zwüsche dr Reduktion uf ds'Wäsentleche u de viune Möglechkeite, wo sech biete. So chöi mer d'Weiche für ds'nöie Jahr steue u bestimme, weli Richtig mir wei ischlah. Äs isch wichtig, dass mir derbi immer ä Sinn erkenne u zum Wouh vo auem Lebändige entscheide. Glichzytig isch am 23. Dezämber 2022 dr Chiron im Widder wieder diräktlöifig worde. Är hiuft üs, vergangen Verletzige aktiv i d'Heilig ds'bringe u dr Sinn derhinger ds'erkenne, warum üs das passiert isch. We mer dr Blick wieder vorus richte, erwartet üs am 28. Dezämber 2022 äs Sextil vor Venus zum Neptun. Das macht dr Tag harmonisch, kreativ, musisch u spirituell. Am 29. Dezämber 2022 wird dr Merkur im Steibock rücklöifig u macht ono grad ä Konjunktion zur Venus. D'Rücklöifigkeit geit bis am 18. Jänner 2023 u isch di ganz Zyt im Steibock. Somit geit's drum, dass mer di herrschende Regle, Gsetz u Norme uf ihri Touglechkeit prüefe, sig's im private wie im gseuschafleche Berich. Traditionell sött mer i dere Phase keni wichtige Entscheidige fäue u keni wichtige Vertrag ungerschriebe. Am 29. Dezämber 2022 hiuft üs d'Venus-Konjunktion aber nomau nache ds'gspüre, was üs würklech guet tuet. Dr erscht Tag im nöie Jahr bringt de ä intensive Aspäkt, we d'Venus ä Konjunktion zum Pluto macht. Mir chöme mit üsne Ängscht i Kontakt u wärde ufgforderet, meh a üs säuber ds'gloube. I däm Sinn äs guets Nöis.